

四庫全書

史部

欽定四庫全書

史部

硃批諭旨卷八十九
九十

臣 永瑤恭校

編修臣 袁謙勛

總校官中書_臣 朱 鈐

校對官中書_臣 朱 忻

謄錄監生_臣 曹師曾

欽定四庫全書

硃批諭旨卷八十九

硃批黃焜奏摺

雍正五年閏三月二十日湖北布政使臣黃焜謹
奏爲奏

聞事竊臣蒙

皇上天恩特授湖北布政使已經到任其通省官員之
賢否倉庫之盈虛及凡有關於

國計民生者臣自當欽導

聖訓實心料理另行奏

聞謹將每年正雜錢糧耗羨銀兩與夫支銷及存庫數

目并通省各官暨臣養廉等項開具清單恭呈

御覽理合繕摺奏

聞謹

奏

不在言只在行朕無暇覽此即覽之亦難確信必無虛

僞但宜勉力實行爲要

同日又

奏爲

聖恩高厚難名臣職涓埃未報敬陳管見少盡愚忱事

臣本庸愚蒙

皇上格外弘恩以有罪之人

特授副都統旋用爲布政使到任以來毫無報稱寤寐

思維實難自安雖偶有管窺蠡測何足仰裨

高深此奏所謂心有餘而識不足朕是以深嘉汝心而哂汝智慮之迂淺不通也但感激微忱不能自已有一得之愚敬爲皇上陳之

一阿爾泰臺站宜安兵也查張家口西北至阿爾泰皆係四十八家及喀爾喀夷人住牧南則河套北皆外夷東抵奉天西達巴爾坤一路數千里並無山川險阻今插漢叟兒查克拜達里兩處雖有大兵居住然指日凱旋終屬塞外不可無備今張家口外自四臺至三十臺俱係喀爾沁蒙古分發

各臺住牧已久服習風土安居樂業再伊等久隸
版圖並無王子管轄而關東地方又俱有親屬更
可互相牽制將來生齒益繁實與甘涼肅等處無
異臣愚以爲自頭臺至三臺附近內地可以不必
紛更其查克拜達里現有發遣種地人犯已可作
一大鎮而孤立少援敬請自三十一臺至三十五
臺俱一例更換喀爾沁住牧再於四臺至三十五
臺每臺六十戶內挑選兵丁量給月餉雖不能聲

援接應以爲犄角之勢然綿亘數千里皆有恃以爲固矣

一臺灣兵民宜立法經理也查臺灣孤懸海外實閩省之門屏而福建漳泉粵東惠潮一帶居民領照往臺耕種獲利之後即回故土頂替往來視同傳舍此皆緣臺灣舊例兵民不許攜帶家口但兵時常更換應遵舊例民欲其久居如不帶家眷則毫無顧戀易於犯法臣請嗣後凡有願往臺灣種

地者俱令攜帶家口前往自然可以安分樂業再查臺澎二處額兵一萬舊例三年之內於通省營伍內撥兵調換誠良法也奈原去之兵到臺之後或私取眷口或自置產業不願換回而新去之兵內地有父母妻子之繫念不願赴臺兵丁彼此不願一時更換數千人營弁惟恐激變俱虛應故事歷年止有換班之名而無換班之實況內地發往換班之兵如建寧邵武汀州等處往返甚至累月

經年不獨兵丁跋涉維艱且營伍空虛深爲未便
臣愚以爲嗣後換班兵丁俱在沿海附近營內輪
流撥換更須逐月陸續發往更替務於限內照數
換完如此則臺灣換班之兵該管營弁易於清查
更替而內地各營亦可免營伍虛懸之慮矣

一寧夏至榆林可通舟楫運糧也夫榆林安邊定
邊連接花馬池築牆設險皆爲衝要但四望黃沙
糧道險遠自古議榆林者俱以芻糧爲急查寧夏

實產米之區穀多價賤每有熟荒之慮臣前任洮
岷道時辦差寧夏見商民自中衛乘舟由黃河以
至寧夏順流而下水勢平坦以此推之則寧夏順
流繞河套以至榆林近境諒必可通臣愚以爲寧
夏地方應設立官船百隻將每年贏餘之米陸續
運至榆林附近地方積貯備用似與軍糈不無裨
益但此處河道臣並未經歷恐聞見不周伏祈

皇上教訓

一土司宜立法防範也夫今之土司無異古之封建但古制公侯不過百里今土司之大者延袤數百里部落數萬餘搶刳村寨欺壓平民地方官莫之敢指如遇投誠歸化之生番輒議令其管轄一則曰以土治土再則曰素所畏服不知日積月累漸成尾大不掉之勢今請自後土司有犯俱改土歸流凡有投誠歸化之生番或歸流官或另設頭目管轄則土司之勢不至日熾易於鈐束矣更有

邊地之民在土司名下中馬或在土司地內耕種者又各處土司皆因歸化日久地方官俱漫無覺察聽其往來自便甚有在城市之內置買房屋及經營生理者亦有延請內地幕賓代筆主文者如不行查禁恐不法之徒妄生事端亦未可定臣請自後邊地之民有在土司名下中馬種地者俱令地方官三年一次稽查造冊存案無致民番混淆凡各處土司不得置買內地產業及延請內地之

人如此則土司無內外鈎串之人必守法安分於邊疆大有裨益矣以上數條俱邊疆大事

臣何人

斯敢越職妄言但

臣受

恩深重實不敢以循分供職遂爾塞責有負

皇上格外之生成是以不揣冒昧上瀆

聖聰伏乞

皇上教訓謹

奏

所奏數條內甚有不通處亦有現在欲行之事朕若一
一批示既無閒暇且非爾現任內切要之務似可不必
然觀爾居心甚屬可嘉惟不脫迂淺二字耳當擴充學
問必令胸襟開濶識見精明方可計議大事也勉之

雍正五年六月初六日湖北布政使臣黃焜謹

奏爲奏明交代事臣到任後於閏三月十九日准前

任布政使臣王克莊移送交代冊籍到臣因欸項
不清移回另造遲至五月初四日方准更造移送

前來查王克莊移交正額銀三千五百四十八兩零又不入交代雜項銀一萬四千餘兩逐一查核雖無虧空但應支雍正五年三月閏三月荊州駐防官兵俸餉因本年錢糧徵解不前王克莊遂將雍正四年地丁屯餉及各案銀兩共那用銀四萬五百七十三兩零臣已造冊詳明督撫二臣再王克莊任內共動用過三分歸公耗羨銀五萬五千六百四十六兩零臣查其動支款項漫無頭緒已

將不便准銷銀一千二百四兩零又鄭任鑰墊支
無可著追銀五百三十七兩零王克莊墊支無可
著追銀二百三十七兩零詳請督撫二臣令彼自
行議補再布政使兼理都司事務省局庫內除被
叅前任都司李愈隆賠補軍器之外尚有應貯盔
甲並鉸鎗刷刀腰刀礮位鳥鎗過山鳥大小鐵子
礮子長鎗等項因歷年久遠俱已朽爛不堪應用
從前各官每逢交代時惟於冊內註明銹壞字樣

因循接受臣不敢再爲因循已將朽爛緣由詳明
督撫二臣現在查議再前任撫臣鄭任鑰布政使
王克莊任內有部餉添平銀一千六百五十七兩
零應伊等自行捐補之項乃鄭任鑰等槩於耗羨
項下動支臣已查明追出現在貯庫又湖北荊州
府同知翁年倫名下無著關稅銀一萬八千三百
八十餘兩原議督撫司道分作四限公捐完補已
經具

題在案不意名雖公捐每年仍於耗羨內動支臣查
翁年倫之案係

題明公捐不便動支耗羨今歲九月又屆四限全完
之期臣不敢因循動支已將臣應得存留坐平銀
一千二百兩捐出湊補外其餘仍照原議公捐補
項已詳明督撫二臣訖臣受

恩深重職司庫藏惟有秉公查核不敢稍爲徇隱所有
臣接受交代事宜理合據實奏

聞伏祈

睿鑒謹

奏

不事徇隱可嘉之至既肯因公破面即當徹底爲之不
可中道而止設或將一半取信於朕又留一半暗做人
情且聲言出於不得已而歸怨於朕以圖兩益於已此
等巧術斷乎不可且亦必不能逃朕之鑒照也試思朕
成全汝父子之恩若不致身報效揆之天理人情均所

不容況汝後半世功名不可限量亟當加勉作一人物
其間所全者甚多亦何憚而不爲之耶於朕前除秉公
竭誠實力奉行之外餘無二策勉之勉之

同日又

奏爲奏明交代事竊臣已將前任布政使臣王克莊
移送交代冊籍並臣逐一查核情由另摺

奏明所有王克莊任內收支耗羨銀兩款項數目謹
另繕清單恭呈

御覽謹

奏

閱所開摺內督撫支用甚多督撫豈自無養廉之項乎
向來李成龍鄭任鑰應得養廉共計若干查其當於公
項取用則已若係濫支公項即當令其賠補至如正副
考官程儀等項亦皆屬爾等私用類斯數款何得竟謂
必應動用公項耶爾當斟酌

同日又

奏爲恭繳

硃批聖訓事

臣於本年五月初二日奉到

硃批

臣

摺隨恭設香案叩頭開讀蒙

皇上諄切教誨跪誦之下感激涕零

臣何人斯生逢

聖世得邀此千古未有之

異數也自後惟有勉力學問竭盡駑駘以圖仰報

天恩於萬一耳所有奉到

硃批奏摺理合恭繳謹

奏

極常勉力自愛多有人奏汝云黃焜除操守二字之外何事不能辦理朕詢之爾父據爾父力保爾有守爾倘於清之一字不能黽勉豈惟不忠且兼不孝矣可不勉乎

雍正五年七月二十九日湖北布政使臣黃焜謹
奏爲恭謝

天恩事臣於雍正五年七月十九日奉到

硃批奏摺三件奏匣四箇隨恭設香案叩頭開讀祇領
訖竊臣一介庸愚蒙

皇上擢用湖北布政使到任以來時以曠職爲懼蒙
聖恩屢加教誨今復

領賜奏匣聆如綸之

天語恍同提命之親承沐格外之

殊榮愈切捐糜之難報惟有益勵清操黽勉供職冀圖

仰報

天恩於萬一謹

奏

奏匣原爲國家政事有益而頒密之一字最要非爲汝等誇張聲勢以作威福之具也須慎之又慎少不密禍不旋踵前車覆轍甚多當深以爲戒也

雍正五年八月十九日湖北布政使臣黃焜謹

奏爲敬請

睿裁事雍正五年八月初四日奉總督臣福敏牌行七

月初一日欽奉

上諭湖北地方咸寧等八縣三衛被水朕深爲軫念若
仍令輸納錢糧民間未免拮据著將本年錢糧全行
蠲免倘有已經完納者准作雍正六年應完之項等
因欽此隨抄寫告示遍貼曉諭欽遵外

恩綸到楚軍民老幼歡聲震地感激莫可名言臣伏思
湖北沿江窪地雖稍覺被水其餘府縣收成實有
九分十分不等即被水縣衛之中高阜之地仍屬

豐收其低田被水亦漸次涸出將來可以播種二
麥現今米價平減地方寧謐督臣又推廣

皇仁凡被水州縣俱各多方撫恤今復蒙

皇上全免錢糧

恩出格外但查蠲免往例俱按被水分數之輕重照例
分別蠲免從無全免之事今

皇上沛浩蕩洪恩全行蠲免臣何敢再爲瀆請但查未
被水之村莊現獲全收倘槩不令其輸納恐非小

民貢賦之意臣職司出納不得不深思熟計以臣
愚見似應止將各州縣衛被水里區圖甲全行蠲
免其未被水高阜田地仍照舊徵收則

國計民生均有裨益緣此番

上諭係從來未有之

曠典無例可援臣布政司衙門有造冊之責是以未敢
緘默理合繕摺上瀆

聖裁伏祈

欽定四庫全書

硃批諭旨

卷八十九

十四

聖恩教訓遵行謹

奏

朕此番施恩格外因憫念濱江數州縣每被水災之故
耳况諭旨既降何可更易所奏知道了似此等有意作
用嗣後不必切記

同日又

奏爲敬瀝下情仰祈

睿鑒事竊臣庸碌無能蒙

皇上逾格簡用授茲重任惟矢竭愚誠冀圖仰報萬一
凡遇地方應行事件及庫帑耗羨銀兩矢公矢慎
不敢少有徇情瞻顧上負

皇恩遂覺諸事未協督臣福敏之意因而每遇公事或
臨限苛駁或有意耽延欲加之罪俾無辭免如督
臣署巡撫事務飭取盤查各屬貯庫印結臣已於
限內查送督臣一面批駁一面叅報遲延又臣因
前布政使動支耗羨款項不清詳請還項督臣苛

駁數次嗣於六月初六日復備細具詳至今兩月
有餘竟置高閣使臣無所適從臣受

恩深重寢食夢寐惟思圖報

國恩豈肯以上司威懾委曲將順亦不敢有意違拗
致乖職守惟是督臣係封疆大吏凡遇事件詳慎
駁查理所宜然但一味懷私不應駁而駁臣之叅
處固不敢辭恐地方公務反致遲延咎更難諉用
是惴惴靡寧上瀆

天聽實非敢誣謗大臣自干重譴也臣焜戰慄恐懼冒死陳

奏伏祈

聖恩鑒宥謹

奏

福敏爲朕所深知之人斷無搜求苛刻於爾之理其或有不應駁而駁者蓋緣不諳外任過於慎重之故爾遽於此懷疑誤矣朕觀爾此奏亦不過因福敏即日回京

恐其言爾之短預防之意耳朕謂可以不必如自信得及縱令福敏回京叅奏不妨二字可保倘自信不及即使福敏回京舉薦將來必敗四字亦可預定爾其坦然勿慮但當以秉公潔已自勵在爾分中第一操守爲要果能無愧此二字可許爾平穩上進也勉之勉之

雍正五年十月初三日湖北布政使臣黃焜謹

奏爲薦舉屬員事竊臣蒙

皇恩特授湖北布政使前於跪聆

聖訓時蒙

皇上不鄙愚陋

諭臣留心屬員之賢否分別舉劾臣到任以來凡有不職之員已經督撫二臣陸續叅

奏今查得襄陽府知府尹會一雖到任未久見其居官勤慎品行端方又荊州府屬之興山縣知縣王琪辦事勤敏才堪任使臣欽遵

諭旨據實奏

聞以備

皇上採擇臣受

恩深重無可圖報今以薦舉屬員上瀆

聖聰並不敢少有私心自蹈欺妄亦不敢稍爲洩漏借

此市恩伏乞

皇上睿鑒謹

奏

詢之邁柱斯二人未見有長處此奏殊爲可疑

硃批諭旨卷八十九

欽定四庫全書

硃批諭旨卷九十

硃批管承澤奏摺

雍正五年九月初九日四川布政使臣管承澤謹
奏為奏

聞事竊臣世受

國恩涓埃未報荷蒙

皇上格外超擢授以四川布政使隨於本年四月二十

八日跪聆

聖訓導

旨於五月初四日與

欽差醫官劉裕鐸一同起程六月二十七日到四川省

城同劉裕鐸向督臣岳鍾琪宣傳

恩旨即於是日到任受事所有臣恭謝下悃謹循例懇

請撫臣憲德代為

題達茲受事兩月查四川通省錢糧雍正四年

奏報共額徵丁條糧銀三十三萬四千八百四十八兩零各屬州縣俱能依期完納毫無拖欠其通省倉穀除東川府議令改歸雲南外川省實應存貯米穀青稞等共四十一萬三千九百四十石零臣到任後即嚴行各屬州縣加謹收貯不許存銀抵補借端掩飾俟九月收成後臣即詳明撫臣專委能員細加盤核如有虧缺霉爛存銀抵補等弊即行詳揭不敢瞻徇再查川省稅務成都夔州等八

處舊額止解銀八千七百八十一兩零所有從前
隱匿之處與分送督撫司道府各衙門稅規陋習

今幸逢

聖恩寬宥許令自首免其究問雖各據照數首出統歸
正項共約計銀九萬三千九百四十一兩但恐止
首分送陋規款項其自行徵收者猶多隱匿未可
信為實在數目臣現在嚴飭經理稅務各官儘收
儘解俟收足一年彙總計算方可酌為定額再臣

據護布政司成都府知府王凝移送交代各冊臣
隨逐項清查計該存貯銀六十萬七千二百五十
一兩零內有前司羅殷泰於擅動庫銀案內未補
還銀二萬四千二百三十二兩零又江寧協餉於
羅殷泰任內未補解短少銀八百四十二兩零臣
已報明撫臣移咨催補實存在庫銀五十八萬二
千一百七十七兩零於八月初十日經督撫二臣
盤查無缺現在會

題再川省今歲年成各屬俱有七八九十分不等米價較五六月間漸平民情安帖再通省州縣各官離省寫遠一時賢否優劣未能盡悉撫臣憲德現在更番調驗臣隨當面考核並察其平時居官實蹟倘有才守汚庸年力衰邁不能稱職者即當據實詳揭不敢姑容至各處地方事宜以及民情土俗有應當舉行者臣甫經到任未及周知容細心查察陸續奏

聞為此謹

奏

勉之勉之莫徒於章奏之間用意而不以實行為務果能行與言符朕自有照鑒

同日又

奏為奏

聞事竊臣接受護布政司成都府知府王凝交代各冊查有前布政使佛喜存貯在庫未經詳請咨部各

項銀兩不無隱匿情弊當據護司王凝詳揭逐細開列轉請具

題此外復查得布政司衙門舊例各屬州縣每年共解條糧耗羨銀二萬一十四兩零內督臣糧規銀三千三百三十兩撫臣糧規銀六千六百六十兩布政司糧規銀一萬二十四兩零乃前司佛喜在任一年零三個月收過銀二萬八千五百五十八兩有零臣隨逐項清查佛喜收雍正四五兩年分

糧規銀一萬二千六百七十二兩零收雍正四五
兩年分學租田房等耗羨銀二百七十五兩零二
項共一萬二千九百四十七兩佛喜收作任內養
廉之數又查得佛喜一收雍正四年條糧協餉等
項於未更換平盤之先收平頭餘剩銀二百一兩
零嗣經

奏稱打燬平盤其兌收時每一百兩尚有多四五錢
以至一兩不等收過平頭多餘銀六千九百六十

五兩一找發各府州縣雍正四年俸工銀佛喜每
百兩暗扣二十兩共扣銀三千三百一十九兩零
一給發各府州縣雍正五年春夏俸工銀佛喜每
百兩扣一兩共扣銀一百四十四兩零一於雍正
四年科考賞賚花紅銀佛喜止扣半給發扣收銀
三百四十一兩零又找發雍正二年歲考花紅銀
佛喜亦扣半給發收銀六十六兩零一彙收雍正
四年各屬看報銀三千三百七十四兩五錢內除

支給提塘三千八十兩外各州縣尚未解銀一百七十四兩零佛喜收已解餘剩銀一百一十九兩零一佛喜收成都等處稅規隨堂銀共二千九百七十一兩零又收雍正四年各處稅耗銀一千一百八十七兩零又於續補稅銀內收耗羨銀二百四十六兩零以上六項共銀一萬五千六百六十餘兩皆係布政使佛喜越例侵收臣不敢不據實奏

聞伏乞

皇上睿鑒施行謹

奏

知道了將其越例侵收各項詳明督臣岳鍾琪撫臣憲德可也

同日又

奏為勸首田地嚴飭開墾事竊查川省田地界在山僻處所民間欺隱者多從前歷任各官雖經陸續

勸民自首然觀望不前所報無幾本年七月初五日接准部咨奉到

皇上恩旨寬限一年准各省官民自行出首將從前侵隱之罪悉從寬免其未納之錢糧亦不復追問欽此
欽遵在案茲據本年分各府州縣已首出上中下
田地共三千三百九十一頃零該徵丁條糧銀四
千三百五十五兩零徵米五十石五斗零臣已造
冊送部查核訖今又據各州縣首出田地一千八

百七十四頃零該徵丁條糧銀三千一百六十四兩現在催造清冊由撫臣

題報外臣仍嚴飭各州縣勸導鄉愚務於一年之內陸續盡行首出毋致絲毫欺隱復干罪戾再查川省田地有已荒霸荒二種積弊臣到任後初悉情形已嚴飭各州縣細加查察倘棍徒衙蠹及紳衿人等有此已荒霸荒情節已荒則量為酌處姑從末減霸荒即嚴為究處按律詳揭該州縣隨親往

踏勘履畝細丈一有閒曠即撥付安插新民開墾
立業庶地皆成熟而勸首之下可使民無隱糧野
無曠土而

國賦日增矣為此繕摺奏

聞謹

奏

據奏查究包荒霸荒等弊言之易行之難若州縣不得
其人徒滋紛擾而亦斷不能清釐也欲為此舉必先秉

公察吏得人而後行之方是竭力次第措施不可急迫
冀收速效

雍正六年二月初六日四川布政使臣管承澤謹
奏為奏明米價暫緩商販事竊川省素稱產米之鄉
秋成之時米價甚賤於雍正五年十二月內疊據
遵義重慶夔州保寧等府詳報米價騰貴每石一
兩七八錢至二兩以外等因又於今年正月內據
夔屬之梁山縣具報米價高昂兵民糴食維艱詳

照存七糶三之例借支倉穀便民臣隨轉詳撫臣
已經照詳准行臣復各處察訪知米價騰貴緣由
在遵義以福建廣東湖廣貴州四省來川人民經
過買食遂致米價頓長重慶因係川省總滙各處
商販雲集米價亦一時頓長夔州保寧二府以及
其餘府屬有產米地方俱已聞風趨利裝至重慶
就賣有素不產米地方無從得米所以米價高昂
如浙省委員遵

旨買米二萬石楚省委員儘銀三萬兩糴買俱因市價騰貴至今未曾報完且軍需米石正在預備之際據總辦軍務建南道劉應鼎移稱現應備米一萬一千石誠恐一時採買價愈高昂臣再四思維軍需米石已詳明撫臣行文臨河各州縣暫行動支倉穀按州縣存貯之多寡酌撥碾足一萬一千石由水路運至雅州由雅州陸路運至打箭爐備用俟秋成時照數買補還倉至目今米價高昂臣現

在詳請撫臣暫行出示停止商販俟於軍務畢日
並湖廣等省來川人民安插開墾之後產米饒裕
再行聽其販運如此則既可流通於將來而又可
平價於目前矣臣為地方起見暫行禁止商販理
合繕摺奏

聞謹

奏

此舉是憲德亦經奏過矣

同日又

奏為奏

聞事竊照川省田地往往因界址不清彼此爭訟臣到任後每逢放告之期見告訐田土者十有八九臣俱批行各屬州縣務往兩造田畝親身勘丈其丈出餘田即令按畝納糧統入自首冊內查報既息訟端亦可以漸次清出欺隱計去年自首出田共一萬五千九百四十二項零應徵銀二萬三千四

十兩七錢在案再查川省錢糧科則不一一府有一府之科則即一府中各縣又有各縣之科則輕重懸殊臣曾面陳撫臣細為籌畫因相沿已久一時未能輕議更正今幸逢

皇上覆載洪恩發帑銀十萬兩為安插入川人民牛具籽種口糧之用又

欽差科道等臣到川清查田地撥荒安插此誠千載一時臣思欲乘此一清從前之積習謹於去年十二

月內設立自供單一紙分發各府州縣令於有田之家挨門逐戶各給一張著令本民自填田畝丘形段塊錢糧若干荒地若干分析四至註明已納糧未納糧鄰佑鄉約連環互保彙送各該州縣存為自供清案嗣後倘再敢有隱糧包荒霸荒等弊一經查出本人暨鄰佑鄉保一體嚴行究治今已通行各屬先為查察暫立規模惟俟

欽差各臣到日會同松茂永寧建昌川東四道齊集省

城臣等公同合議統俟議定分路查勘之後再具
摺奏

聞為此謹

奏

因時制宜辦理甚好勉為之

雍正七年六月十五日署理直隸天津總兵官臣

管承澤謹

奏為奏

聞事竊臣遵奉

諭旨前赴天津總兵任所一路查看塘汛查得通州各塘每塘設兵五名張家灣起每塘止兵三名四名不等當此漕船鱗集之際往來催趲在在需人即汛兵五名只可敷用若缺少一二名前後不能相顧臣隨嚴飭將弁諭令照例添足五名以資巡查趲運臣又訪聞各汛尚有不肖弁員需索漕船方物陋規臣隨嚴加申飭令其盡改前非毋干罪譴

好

嗣據務關營叅將張茂揭報安平汛把總竇成業
需索漕船銀錢土儀酒食等項與臣經過訪聞適
相符合隨據揭咨會提臣咨革究審并行文經管
漕運協營出示嚴行禁革務去莠莠以清積弊至
於地方情形營伍事務臣蒞任伊始尚未周知容
隨後確查次第舉行另摺具

奏所有查過塘汛弁兵情節合併奏

聞謹

奏

覽奏俱悉勉之

雍正七年六月二十五日署理直隸天津總兵官

臣管承澤謹

奏為奏明伏汛驟發事竊查天津地方六月十八日
夜風雨驟發以致河水頓長臣正在差員赴南北
兩河分路查看間隨據務關營叅將報稱十九日
午後長水一丈有餘衝開沙河堤岸是夜復將沙

河月堤衝開河西務月堤亦衝開二處水勢正在
漲發等因稟報前來臣即差守備劉福德星夜前
往查看一面仍咨呈直隸督臣訖至二十四日據
該備查看回稱河西務觀音堂月堤漫決四十餘
丈十百戶月堤漫決五十餘丈附近民房衝壞約
有二百間民人俱無損傷惟沙河與河西務之水
合流直趨武清縣地方在高阜之地可保無虞而
低窪之處不無淹沒又據稱自天津關至河西務

北運河一帶漕船有被風損壞沉溺及衝出口岸
因水落擱淺等情臣隨飛飭沿河汛弁協同起剝
并設法撈救米石外再臣查得已過天津關各幫
漕船因重載頂溜難以開行沿途皆有停泊誠恐
各船乘此借端逗留以及船丁水手相聚生事臣
已差委標員并飭汛弁來往巡查以資彈壓俟水
勢稍平催趲前進所有北河水發情形理合繕摺
奏

聞謹

奏

覽奏河水驟發情形知道了至署印缺員請發將備一摺乃係數省相同之事候朕詳細斟酌另降諭旨但一時焉得有如許閒員發往耶

雍正七年九月初六日署理直隸天津總兵官臣管承澤謹

奏為請

旨巡查所屬協營以收營伍實效事竊查天津鎮屬所轄十六協營止標下左營右營與城守營俱係臣同城現在不時簡閱其餘各協營離津二三百里至六七百里不等雖蒞任後已經屢次檄行令其勤加操練復於將備因公進見時面為丁寧告誡勉以仰體

聖心無負厥職但恐未經身歷巡查一切難以周知況沿海地方尤關緊要必須親加查看始能備悉情

形臣先因漕務未敢具

奏今尾幫漕船俱已催出北直境界臣趁此趲運餘
閒之際輕騎減從周歷協營逐加查核果其兵精
技熟者即加獎賞以示鼓勵倘有廢弛營伍之將
備指實糾叅騎射不堪之兵丁斥革另補以及應
行事宜俟確勘後逐一另

奏則營伍可收實效於軍政似有裨益臣因巡查統
轄地方非出境可比不敢具本謹繕摺奏

聞伏乞

皇上睿鑒批示遵行謹

奏

好巡察所轄協營係分內應行之舉也

同日又

奏為奏

聞事竊臣據文安營遊擊周涵稟稱文安縣居民盧尚義妻梁氏在本村路傍拾銀六兩五錢交與姑張

氏收存以備人找尋後因西柳河村王姓尋覓張氏梁氏同衆人將銀付還王姓感情買白布二疋相謝姑媳俱不肯受已經文安縣查確詳報等情具稟前來臣查閨門婦女生長鄉村目不覩詩書之說耳不習禮教之言今能見利不取守義自安實為僅見之事皆由我

皇上盛德感人至誠動物之所致茲據該遊擊具稟前情臣不敢壅於上

聞為此謹

奏

文安縣民婦拾金不昧已有旨矣

雍正七年十月十一日署理直隸天津總兵官臣

管承澤謹

奏為奏明查過營汛情形事竊臣摺奏查看所屬營

汛恭奉

諭旨准行遵即前往天津東北一路查看得武清霸州

務闕文安崔黃大城等營兵丁技藝雖未純熟猶有規模再加操練自漸可整齊舊州寶坻兩營兵丁技藝較之各營不及臣已面加嚴飭教以操練法則令其盡心訓習勒限三月再候考驗如仍平常即以溺職叅處又東安汎千總馬雲性耽麪藥怠於操防已照例咨部斥革再各營兵丁如鎗箭不堪及年力老弱者即行革除另補其兵丁內有烏鎗精熟騎射可觀者俱仰體

皇恩量加獎賞以示鼓勵臣蒙

皇上天恩委署總兵印務惟有竭盡心力勸懲兼施務期營伍整飭少盡職守斷不敢稍有因循上負

簡用至意但臣識見短淺恐辦理未協求

聖主指示除現赴河間涿州一路查看外所有看過營汛情形理合據實奏

聞謹

奏

勸懲兼施斯為整飭要道可嘉之至勉之

同日又

奏為奏明暫停城工事竊臣准長蘆巡鹽御史鄭禪
寶咨稱九月十一日前往山東驗放鹽引所有天
津城工

奏明暫交臣督令商人安岐及時修築等情遵即前
赴城工處所逐加查勘并飭管工員并加緊趲修
務期堅固今臣於查看營汛便道回津赴工查閱

自十一日後做過工程西南二面門樓甕城及西南角樓南門以東城垣垛牆海漫礮臺馬道礮礮等項俱於九月二十七日完竣南門以西城垣二百四十四丈已築有五六分工程復據管工驍騎校雙珥呈稱本月初二日夜下雪二寸初三日風寒冰凍若興工作恐不堅固請照往年停工俟春和再為修築等情臣查城垣關係緊要往年遇冰凍時俱係停工今已下雪結凍是以照例令其停

止所有停工緣由理合繕摺奏

聞謹

奏

所奏是自應照例准其停止

雍正七年十二月十六日署理直隸天津總兵官

臣管承澤謹

奏為奏明查看營汛已畢事竊臣巡查所屬營汛業將看過務關武清等營繕摺奏

聞仰邀

睿鑒今又看過各營如河間副將所管左右城操三營
及大沽營蒲河營通州副將兼轄之三河玉田營
兵丁騎射俱屬可觀其分防磚河標右營及涿州
拱極樂亭王慶院營通州副將所管存城兩營并
所轄采育豐潤張灣等營次之臣將各營之訓練
可觀者令其益加鼓勵更進純熟各營之訓練不
及者嚴飭上緊演習聽候覆看至各營烏鎗今已

欽遵

諭旨加入鉛子令打準頭惟合隊進步連環多間斷不齊未盡合式臣將進退步法詳加教導并令將備將弓箭鳥鎗分日演習務期熟練各營畫一以收實用至所屬副叅遊守等員臣經歷各營敬將我皇上慎重營伍惠恤官兵至意逐一宣布令其黽勉盡職無負

聖恩現在所屬如張灣營守備鄔琪庸懦不及崔黃營

守備韓緒文貪婪不職俱已另疏

題叅再各營千把總內有懈怠廢弛如阜城汛千總
張有信高川汛把總劉允恭安陵汛把總高進安
閭家村汛把總蕭漢俱照例申部斥革另行選補
務使大小得人庶於營伍有並臣以庸陋下材蒙
皇上天恩委署總兵印務毫無報效惟有恪遵

聖訓敬謹小心整飭將弁操練兵馬斷不敢少有因循

上負

高厚之恩也臣今查看已畢所有看過各營官兵情形
理合具摺奏

聞謹

奏

直隸營伍廢弛已極須竭力整頓方能改觀此奏朕不
深信以為然也

雍正八年正月二十二日署理直隸天津總兵官

臣管承澤謹

奏為恭謝

天恩事雍正七年十二月二十一日臣齋摺家人恭捧
欽賜福字一幅湯羊一隻到津臣隨郊迎至署恭設香

案望

闕叩頭祇領訖伏念臣以庸陋下材署理天津總兵印
務一無報稱茲復蒙

皇上隆恩頒賜下逮微末

恩榮逾分感激難言惟有凜遵

聖訓竭力整理營伍勉盡職守以冀仰報

高厚於萬一耳理合繕摺恭謝

天恩謹

奏

覽奏謝知道了

奏報鳳鳥來儀之摺留中

雍正八年二月二十二日署理直隸天津總兵官

臣管承澤謹

奏為保舉能員仰祈

睿鑒事竊查臣屬王慶院一營地處淀河運河之間不特操練兵丁兼有催重趲空盤查稽察之責地方緊要今該營都司周科已經休致所遺員缺必得諳練之員方可勝任查有臣屬之務關營守備張應甲莅任三載辦事勤敏諳練營伍熟悉催漕事務洵屬能員若以陞授王慶院營都司可收駕輕就熟之效如蒙

皇上天恩允准其務關營守備亦屬沿河要汛查有藍翎張大烈係雍正四年前任督臣李紱具題奉

旨分標試用之員在津日久前任鎮臣委其監修城工辦理無誤臣署任後復令趨運巡查俱能盡心竭力若以該員補授務關營守備委屬人地相宜此二員者實皆可用之才因非

題補之缺臣不敢冒昧具

題但為營伍地方起見謹繕摺奏

金匱要略卷九十一
聞伏乞

皇上睿鑒施行謹

奏

覽奏已悉候另有諭旨

雍正八年四月初九日署理直隸天津總兵官臣

管承澤謹

奏為恭報得雨日期事竊查津鎮所屬地方自二三月來雨澤稀少至三月二十五日津城得有微雨

嗣據通州涿州務關蒲河樂亭武清大沽拱極舊
州等各協營報稱得雨相同俱未霑足未敢奏

聞茲於四月初八日子時細雨至辰時止又於未時大
雨至申時止津城細雨兩次臣當即專差四路查
看據覆稱入土有四五寸不等雨澤普遍土膏滋
潤上年所種秋麥長有一尺有餘秋穀雖未種齊
已種者發有二三寸此番得雨之後秋穀皆可補
種二麥可望收成等語隨於初九日據磚河武清

王慶院等營並報得雨前來仰惟

聖主念切民依時以稼穡雨暘為念所有地方得雨霑足情形理合繕摺奏

聞謹

奏

得雨情形知道了但此等處如或少有粉飾即干欺隱之咎當戒之慎之

雍正八年四月二十二日署理直隸天津總兵官

臣管承澤謹

奏為恭報南糧頭幫過關日期事竊有江南淮安衛
二幫重運糧船四十九隻於雍正八年四月二十
日抵天津臣立即督催過津關北上訖仍嚴飭沿
河弁員催趲跟幫船隻前進外所有南糧頭幫過
關日期理合繕摺奏

聞謹

奏

現今河水淺乾重運行遲亦係無法可施之事沿河催趲員弁諭令酌量為之

同日又

奏為凜遵

聖訓事竊臣於本月初九日恭報津城得雨一摺奉有硃批臣跪讀之下不勝恐懼戰慄伏念臣以庸駑下材屢荷格外

天恩一無報稱茲復蒙

聖誨提撕惟有勉竭愚誠恪遵

皇上無欺之訓以圖仰答

洪恩於萬一耳所有凜遵下忱理合

奏覆謹

奏

但勉心行與言三者如一何往而不利貞也假若捨本而惟末是務縱暫獲一時小利後未有不致敗露而惟咎殃者常人每多見不及此汝其勉之

雍正八年五月初二日署理直隸天津總兵官臣

管承澤謹

奏為奏

聞事竊臣於四月二十二日據大沽營遊擊李椅稟據
外委把總關世繩稟稱二十一日帶兵查看蝗蝻
至靜海縣屬興國場竈地卑濕處所俱有蝗蝻生
發現移場司并撥兵撲捕等情前來臣隨飭該營
守備帶領目兵前往協助今於五月初一日據遊

擊李椅報稱該備會同靜海縣典史場官督率兵
丁民竈夫役於四月二十九日將蝗蝻俱已撲滅
等情臣伏思蝗蝻為患屢厯

宸衷茲於邸報內恭讀

諭旨仰見我

皇上軫恤民瘼至意查天津逼近海濱地多窪下蝗蝻
易於發生臣謹凜遵

聖諭嚴飭所屬將備委員不時巡查務於萌動之初即

行剪除消滅所有蝗蝻生發現已撲滅緣由理合

奏

聞謹

奏

蝗蝻為災與否猶屬人力所能轉移之事其加意訪查
一有生發即督飭將備等員盡力撲捕務俾消滅倘稍
延緩致令飛起則其害不可勝言矣勤慎為之

雍正八年十二月二十日署理直隸天津總兵官

臣管承澤謹

奏為敬陳未議仰祈

睿鑒事竊臣蒙戶部劄開大學士公馬爾賽等會議得
奉天錦縣寧遠米十萬石由海運至天津大沽入
口令天津總兵官鹽法道監收交北直地方官雇
船運至德州交與山東地方官運至東兗濟南三
府平糶等因奉

旨依議劄行欽遵在案除將應雇船隻派委運員一切

事宜會同鹽法道移商布政司辦理外查此項米石接濟東兗濟三府民食甚關緊要而海運米船全憑風信抵津遲速難以預定再自津盤量雇船裝載運至德州皆屬上水船行遲緩且到德之後北直與東省押運各員又須盤量交割輾轉濡滯恐不能及時分發平糶今查豫省漕糧據各營汛探報有德州臨清任城東昌長淮徐州前後九幫船隻約米十六萬石自德州以南臨清上下陸續

相接現在守凍以臣愚見莫若將此項糧米內仰
懇

皇上天恩敕令倉場督臣截留正兌平米十萬石交與
山東地方官俟河冰一泮即將原船押運東充濟
三府分發各州縣平糶速濟民食至海運十萬石
俟到津之日臣會同鹽法道監收交與地方官運
至通倉抵還豫省應解平米十萬石之數一轉移
間不獨輓運省便而平糶亦有裨益矣是否有當

伏乞

皇上睿鑒施行謹

奏

已有旨矣

雍正九年三月二十五日署理陝西西大通總兵

官臣管承澤謹

奏為奏明地方情形事竊臣甫抵大通鎮屬一路即有蒙古台吉及喇嘛頭人等差人迎接臣敬揚

皇上德威令彼等咸知感畏查大通離西寧相距二百餘里將到大通有迭爾吉打板山臣經過此山雪深盈尺據土人云盛夏始消冰凍又離城五六里隔一大河山水漲發之時水勢汹涌即有船筏亦難撐駕現今造成大橋二座人馬往來俱各便益至大通新築土城高二丈四尺周圍約四里有餘城內蓋造東西營房四千間有兵丁搬移家口住居者亦有未經搬到者現在飭營造冊清查其各

處卡路塘房除安兵戍守外尚有未修者屢經移
催文員速為蓋造臣到任後即先查看本營左右
兩營存城兵丁鳥鎗弓箭殊屬生疎惟旗幟號令
俱係新製而鳥鎗長短參差半不堪用亟宜如式
製造現在上緊辦理臣蒙

皇上隆恩特調邊疆重任惟竭力盡心整頓料理斷不
敢瞻徇容隱貽誤邊庭有負

聖主委任至意臣伏查天津鎮屬尚有才識操守堪為

邊疆任使之員容另行開列奏請仰懇

天恩敕發西寧大通補用俾臣得收臂指之效至所屬
白塔永安二營兵馬地方未曾查看俟將左右二
營一切兵馬錢糧事宜逐一清查料理立有規模
再行前往閱看謹將大通大槩情形先為奏

聞謹

奏

朕觀陝省武職人材每駕出於直省之上若留心選拔

儘堪驅使奚必舊任津屬人員始克收效況封疆大員
題官帶赴新任之不宜處曾屢有諭旨何乃復為此請
耶

雍正九年六月初九日署理陝西西大通總兵官
臣管承澤謹

奏為奏

聞事雍正九年六月初三日接准都統臣德成咨為知
會事雍正九年五月二十九日接到大學士公馬

爾賽等寄字雍正九年五月十三日欽奉

上諭一道等因移會到臣臣正在准備應調間隨於初

五日復准都統臣德成提臣馮允中清文內開雍正九年六月初四日接得柴達木領兵都統格梅爾咨稱於六月初一日接得騰格里領兵噶蘭大策凌報稱於五月二十八日下午晚時吾們地方札薩那爾布領伊部落將馬匹搶去等語新奉

諭旨如有用兵之處即令署西大通總兵管承澤領兵

前往貴署鎮即領兵丁八百名急速接應前往為此
知會等因到臣緣未知西寧鎮官兵曾否派調
一同帶往之處即於初六日一面星飛咨詢一面
飛調永安白塔并鎮標二營除前次撤回之官兵
五百名外又分派挑選三百名共八百名摘調馱
載請支口糧剋期前往應援續於初八日接准都
統臣德成等咨覆西寧鎮派調官兵一千名初九
日起身出口前赴柴達木聽候部郎鼐滿岱管領

遣發等因又於初九日准都統臣德成提臣馮允
中同日兩咨內開據派赴柴達木領兵遊擊李峻
呈報卑職奉派管領柴達木駐防兵馬於初六日
亥時到二臺駐歇初七日寅時忽據解官程鵬遠
報稱五臺馬匹鍋帳俱被賊夷搶去功加蘇天友
帶傷臺上兵丁俱各帶傷不知去向今五臺已無
馬匹三臺四臺現在緊急等因據此查逆夷既經
在臺上搶馬傷兵而青海一帶恐俱蠢動現在飭

令官兵相機堵禦但夷性叵測誠恐聚衆侵犯內地不可不預為防範等情又咨開本都統等派撥西寧官兵於本月初八日遣發起程出口應援并飭白塔營叅將帶原派就之回兵五百名由黑林口一帶前往口外應援截殺所有部郎鼐滿岱已馳赴柴達木矣相應飛咨希檄飭各營將嚴加防範城守外貴署鎮星速束裝帶領官兵前往應援相機堵截等情臣伏念大通一鎮番夷環處城池

所關甚重而准咨應援事宜又難刻緩除飭令永安營遊擊孫道林保守城池防範各處隘口探聽堵禦與大通相為犄角外復嚴飭中軍遊擊王復加謹保固城池并將大通總兵官印信旗牌准照都統臣德成提臣馮允中

奏明交中軍王復轉齎臣現今帶領遊擊韓光愈守備馬元勳并千把等官共八員馬步兵丁八百名於初九日由黑林口前往探聽相機堵截緣事關

軍機差人齎摺恐有遲誤臣不揣冒昧由驛拜

進合併聲明謹

奏

奉調之際何得延捱遲滯今幸事已平定倘致有誤軍
機汝能保全首領乎似此畏縮不前殊屬大負朕之委
任向後若復如是斷不姑恕戎行之事惟以敢勇當先
為貴戒之戒之

同日又

奏為奏

聞事竊查大通一鎮孤懸塞外新建城垣週圍四里有餘修造營房嚴兵駐守彈壓番夷創設甚善但城上四面並未設有堆房今臣於四門城上每門建造堆房二座通計八座將次告竣欽遵

諭旨出征所有未完之處著遊擊王復督造完固仍令每座設兵五名日則瞭遠夜則巡查務使地方寧謐又所築城牆俱係土壘邊外雨雪過多於今三

年不無冰凍坍塌者備細查閱應修葺者即行修葺應培補者已經培補又四門並無關廂惟南門外有商民蓋造房屋四五十間住居貿易前臨大通一河左右悉皆曠地臣亦造堆房數間設兵四十名晝夜巡緝俾商民安堵又城內向有井六眼因開鑿未深泥淤沙積凡屬兵民皆往城外河邊取水往返五六里深為不便今臣將原井六眼悉淘挖至六七八丈不等已皆得水三四尺有餘此

外又新添二眼尚在開鑿以資兵丁日給又查兵
丁駐防之所糧草為第一緊要然糧須建倉廩收
貯草須設厰所堆積查大通城內雖建有倉廩二
十座並未造完今俱朽壞已咨撫臣速飭文員修
葺酌議堆積在案惟柴草廩所並未設立今臣於
城內西南空地四圍築以墻垣設立一廩俟秋收
時堆積馬草柴薪以防不時之需至邊庭火器最
關緊要務宜預備臣於抵任後具摺

奏明今臣已如式製造烏鎗二百桿分發各營兵丁
日為操演又城內營房四千間除兵丁搬移家口
住居外所餘房屋牆垣倒塌門牕遺失臣特令將
弁盡行添修預候新兵居住以上各項俱關城垣
兵民要務臣因應援緊急不敢遲緩所有未完等
項俱委遊擊王復督造告竣謹備悉具

奏又欽奉

恩旨召募馬六步四兵丁一千名以補前撥巴爾庫爾

之數茲已將及足額所有花名年貌等冊現在攢造送部理合奏

聞又臣昨於五月二十六日由永安營汎哆囉打板起查閱各隘口其間有洒金城景陽嶺野馬川等處俱屬險道咽喉之所又自東北一百二十里係仙密寺一帶樹木叢雜番回錯處實棋枰二山緊要隘口俱應設立營汛加以重兵防範臣令遊擊韓光愈正在繪圖呈

覽間欽遵出師未及

奏達伏乞

皇上敕令德成馮允中查議安設則邊疆大有裨益矣

謹

奏

大通事務與汝無涉矣

雍正九年七月十七日署理陝西西大通總兵官

臣管承澤謹

奏為恭謝

天恩併伸愚悃事竊臣於六月初九日恭報領兵起程

一摺奉到

硃批臣跪讀之下恐懼戰慄伏思臣仰邀

皇上高厚之恩不即加罪謹復蒙

聖誨提撕策勵將來臣惟有望

闕叩首感激涕零何敢復措一詞但查本年六月初五日准都統臣德成提臣馮允中咨調應援騰格里

嗣又准咨據稱逆夷在臺站搶馬傷兵而青海一帶恐俱蠢動又稱夷性叵測誠恐聚衆侵犯內地不可不預為防範等語臣接准來咨隨於地方城守安頓布置嚴加防範因移商寧鎮冀彼此協謀共濟惟是臣所領八百官兵除前撤回之兵丁五百名半在永安白塔二營調取其新派三百名之兵丁一切口糧軍裝等項又悉取辦於寧城臣加緊料理是以西寧官兵於初八日起程臣即於初

九日領兵起程伏念臣世受

國恩何敢延捱遲滯有負

聖主委任之至意以自取罪戾今叨蒙

皇恩格外寬宥臣惟有凜遵

諭旨時時警惕竭犬馬之微誠以仰答

高厚於萬一所有臣感激微忱理合繕摺奏

謝謹

奏

可謂良心喪盡無恥之小人也



硃批諭旨卷九十